

GOVOR ZA DAN OPŠTINE, 5.5.2014. (SVEČANA SJEDNICA)

Poštovani i poštovane, dame i gospodo, dragi prijatelji, pobratimi opštine Stari Grad, Vaše ekselencije. Izuzetna mi je čast što ste uveličali današnji dan Opštine Stari Grad. Ovom prilikom želim da Vam se zahvalim još jednom na Vašem dolasku, te ovo današnje obraćanje pokušat ću da svedem na vid obraćanja ne samo vezanog za Opštinu Stari Grad, već obraćanja koje se tiče sviju nas, bez obzira na razlike u naciji, vjeri, boji kože itd. Zašto sam pripremio današnje obraćanje, a vezano za dan Opštine Stari Grad, procjenit će te i sami, pogotovo uzimajući u obzir da je naša Opština jedna od najstarijih opština u Bosni i Hercegovini u doba modernih uređenja države, gdje se susreću različite vjere, kulture i tradicije što je jedinstven slučaj, a pogotovo u vrijeme velike krize morala, koja nije samo slučaj vezan za našu opštinu, državu, već to je karakteristika globalnog otuđenja jednih od drugih.

Poštovani, svi oni dani koji drugima mogu biti dragi, čestitim i poštenim ljudima trebaju biti puni dobra. Nema praznika u smislu dana koji nisu dragi, nego postoje samo oni dani kada treba da činimo više dobra: da dođemo svojoj porodici i posvetimo im više vremena, da posjetimo prijatelja kojeg odavno nismo vidjeli, da odemo u bolnicu i posjetimo bolesnog, da odemo na groblje ili mezarje i posjetimo nekoga koga smo već mjesecima zanemarili, a možda se radi o ocu i majci, možda se radi o najbližim ljudima nama. Poznato nam je da kada nam se srca zatvore i kada postanu gruba, da od takvih srca, bez obzira na naša nastojanja nema velike koristi, a jedan od razloga zašto čovjekova srca mogu postati gruba jeste kada se bavimo tuđim nedostacima, a ne da popravljamo svoje. Tada, umjesto da se okrenemo oplemenjivanju samoga sebe, umjesto da se okrenemo onome što trebamo uraditi i pripremiti kao odgovor za svoja djela, riječi postupke, mi se bavimo tuđim nedostacima. U tom trenutku postanemo osorni i grubi, te istodobno u tom času, čak i kada želimo da uradimo nešto lijepo neće da nam se obistini i ostvari, a zašto-jer smo pogrešno posmatrali stvari!

Poštovani, dragi prijatelji, kada bismo svi na svijetu nedostatke imali, i kada bi mi te sve nedostatke od drugih znali, to ne znači da mi vrijedimo, jer ničiji nedostatak nije naša i vaša vrlina. Bavimo se tuđim nedostacima, što je u startu pogrešno, zato što se bavimo onim što se nas ne tiče, a uče nas da se upravo takvih stvari trebamo kloniti. Da li se tako ponašamo i radimo u svakodnevnom životu, sami treba da procijenimo.

Kada se bavimo tuđim nedostacima, mahom se bavimo ljudskim grijesima i vrlo lahko i često ljudski jezik zna kazati: „Gledaj šta oni rade“, te umjesto da pokušamo pomoći onima koji su pogriješili, mi ih optužujemo, a nismo ni svjesni, da smo mi upravo počašćeni ako nismo pogriješili kao oni, ali bez obzira na sve to, opet ne možemo pobjeći od riječi: „Gledaj šta oni rade“. Onda opet dođemo u iskušenje istim onim što smo kod drugih gledali, zbog našeg pogrešnog odnosa prema onome šta je dobro, a šta je zlo.

Na kraju, da bi sačuvali svoja srca i da bismo živjeli sretno i sačuvali se od stranputica trebamo biti jaki, a čast i obraz sačuvati. Čuvati svoj jezik da o tuđim manama ne govorimo, jer kako mi jezik imamo i kod drugih jezik postoji. Ako nam oko vidi kod drugog nedostatak, moramo biti svjesni da i mi nismo bez nedostataka, a i drugi ljudi oči imaju. Svaka naša riječ je jedna strijela koja ide i prema nama i prema drugima, može biti strijela koja oplemenjuje i ubija zlo, a može biti i strijela koja širi zlo u našem srcu i našem društvu. Zato moramo svoje duše oplemenjivati i čistiti, jer ako čovjek vidi trun u tuđem oku, a ne vidi u svom stablu, dolazimo u jednu veoma tešku i nezgodnu situaciju, gdje u svakom čovjeku vidimo svog neprijatelja ili u najmanju ruku suparnika.

Ovim bih želio završiti današnje obraćanje Vama, poštovane dame i gospodo i da kada izađemo iz ove sale svako od nas se zapita šta svako od nas može uraditi i pridonijeti poboljšanju današnje situacije u društvu, kako naše lokalne zajednice, tako i općenito.

Hvala Vam na pažnji. Čestitam Vam dan Opštine Stari Grad.

Ibrahim Hadžibajrić.